



BIBLIOTHECA  
UNIV. JAGELL.  
CRACOVIENSIS

41663


1st konyv

L

Biblioteka Jagiellońska





stdr0017170



41663

I







41663


I

P

sec<sup>a</sup> oratio de poenitentia.  
Cracoviae 1623.

Fo<sup>r</sup> sano wroclawian<sup>m</sup> pug  
Questio de Causis. 1622.

Teol. pol. 8623.



❀ ❀ ❀ ❀

*C O L L Y R I V M,*  
*S E V*

# O R A T I O

## De Pœnitentia,

*Post initium Quadragesimæ in supplicationibus Academicis ad S. ANNÆ Anno Dñi, 1623.*

*A M. SIMONE HALICIO,*

*S. Theol: Profess.*

H A B I T A.

41663

76



Ltitudo diuitiarum bonitatis, & misericordiæ Dei, proponitur hoc sacratissimo tempore in medio Ecclesiæ, nostro ex peccatis dolori & erubescentiæ. Accurrimus vndiq; læsæ maiestatis consij cum gentili Chananæa, vt vnicam quisque suam filiam, animam scilicet pretiosissimam, à grauissima ac periculosisima liberet Dæmonij vexatione. Prope exitium est in vnius tyranni rabiem incidere: quod si duo immanitatis portenta, in nostram

A



coiue-

coiuerint perditionem, ne latum vnguem absimus à morte probrofissima. Circumuenti sumus à peccato, proditi à carne Stygio Phalaridi: quæ nobis reliqua spes, si in manu potenti, si in brachio excelsø, & in miserationibus multis Domini nostri, à crudelissima tyranorum seruitute, in pristinam non vindicamur libertatem. Ponite in oculis mentium vestiarum miseræ istius filiæ, matrem miserrimam, quæ hodie acrioribus dolorū stimulis exagitata, importune astat, instat, circumstat, obsecrat, implorat misericordiam filij Dauid. Spectaculum est horrendum & peracerbum, videre subinde oculorum transuersionem, manus distortas, capillum solutum, oris deformitatem, recentem in horas ex novo vulnere sanguinem, quid multis? viuum aë monstrosum cadauer. Stupet præ dolore ferè iam exanimis mater, nec alium inuenit leuationi suæ modum, nisi ut vehementius ad Dominum cum tribularetur clamitaret. *Miserere mei fili Dauid.* Isest peccati fructus, ea est fæderati illius focij tractatio, vexare, torquere, vastare, probris, doloribus, funeribus sempiternis, nostrum genus. Et peccatum & Diabolus ab initio fuere homicidæ. Nos quidem olim ex hac tenebrarum potestate liberati, genus electum, regale sacerdotium, populus acquisitionis, filij Dei dicebamur, sed heu seu infirmitatem, seu stultitiam nostram, post gustum doni cælestis, post participationem Spiritus S. in veteres tenebras recidimus. Abijmus á benignissimo patre, in longinquam regionem, sublata preciosissimâ iustificationis substantiâ, quiue ad diuitem

tem mensam sedentes croceis nutriebamur, ad por-  
corum siliquas nos nostrâ deiecmus prodigalitate.  
Quid iam ceruicibus nostris impendet, nisi consum-  
matio in combustionem. Obuerberat nostras aures illa  
terribilis comminatio: Melius erat viam iustitiae non  
agnouisse, quâm post agnitionem retrouertisse. Retro-  
uertimus nos cum Chananeide, oculis à Deo ad creatu-  
ras transuersis, fastidio rerum spiritualium, quasi spu-  
manti ore vultum Christiani hominis fædauimus, ma-  
nus in vltionem, cupiditatem, iniustitiam distorsimus,  
integritatem conscientiae nouis interdum casibus vul-  
nerauimus. Et pudet nos clamare cum matre nostra Ec-  
clesia pro nobis ipsis ad filium Dauid? Clamemus, nec  
desinamus donec exaudiat Dominus. Audiet ille beni-  
gnissimus, & loquetur nobis verbum consolationis, co-  
gnoscamus modò miseriâ nostram, & ex præscripto Do-  
mini inungamus ægritudinem oculorum collyrio. Agni-  
tæ & confessæ miseriæ, parata est semper misericordia.  
Quænam inquieris ista miseria? Lumen oculorum nostro-  
rum non est nobiscum, spiritualiter cernendi facultatem  
peccatis nostris obscurauimus, aut forte extinximus.  
timor & tremor venerunt super nos, ingemiscimus con-  
tecti peccatorum tenebris. Hoc ego malum duce Deo  
breuiter inprimis demonstro, mox ad tollendam eius  
grauitatem collyrium ex apotheca diuina facio. Erit no-  
bis credo salutare, si prostrati in conspectu Domini, cul-  
pas nostras deprecati fuerimus, per solennē istius tempo-  
ris Antiphonam. Emendemus, &c.

**E**S T quod nobis sapientia veterum, siue in vmbbris, siue in Rerumpublicarum luce propagata inuidet: vtraq; enim inani oblectationis titillatione decepta, vix quid verè pulchrum ac iucundum sit, à longe potuit aspicere. Vtiq; rerum naturalium inspectores, dicerem aliquo modo supra hæc quæ videntur ascendisse, politicorum industriæ omnis perijt labor, & contentio. Illi enim à specie creaturarum in pulchritudinem Creatoris, licet imbecillo naturæ lumine fermentur, venerandum tamen docuerunt: horum gloriæ summus apex, sicut in vmbbris, & lineamentis pulchritudinis, quasi ipsissima pulchritudine conquiescere. Non repeto veterum ciuilium in consecrandis vanitatibus, in quærendis mendacijs, perditam operam & diligentiam: non enim & nostra pseudopoliticorum turba dissimiles habet cogitationes & studiâ. Flexit se forte ad hominem externum & eius fabricam elegantissimam: hic constitit, hic stupet, huc omnem confert iucunditatem & desiderium. Quanta cæcitas animi, qui stupor ingeniorum, non in futurum decus, non ad immortalitatem prospicere: sed quid ventri, quid ostentationi, quid cupiditati, quid auræ populari seruiat? Nec in Sophorum grandi, *Nosce te ipsum*, magna est philosophia. Simul enim ac se ad intuendum hominis augustioris faciem, cum insipientie sua sapientia verterunt, subito ut vespertiliones, à luce veritatis inaccessibili percussi, in tenebras dispersi sunt. Nobis hæc diuinæ gratiæ lux seruabatur, qui in admirabile Christianæ dignitatis lumen, non ex operibus nostris,

nostris, sed ex misericordia singulari liberatoris nostri,  
vocati sumus. Ille cum esset unigenitus Patris, descen-  
dens in terram, in similitudinem carnis peccati, enarra-  
uit nobis altissima suarum inventionum mysteria, & cum  
libertate à peccatis, beneficiorum præstantissimorum in  
nos effudit libertatem. Eo doctore super omnes senes  
intelligere, super omnes prioris sæculi docentes sapere  
incœpimus, quia lucernam pedibus nostris dedit verbū  
suum. Narrabat & doctior antiquitas, de interiori homi-  
ne multas fabulationes, sed non erat testimonium Domi-  
ni fidele, sapientiam præstans parvulis; iactabat Synago-  
ga legis diuinæ cognitionem, sed non conuertebat ani-  
mas, non sanabat detectas infirmitates. A Christo pri-  
mùm didicimus, quantum distet vetus Adam à nouo, ter-  
renus homo à cœlesti, corpus iustitiae, à corpore peccati,  
quando ex veris participibus diuinitatis, ex primitijs  
Spiritus Sancti, audiebatur verbum illud bonum, *Vnuo  
ego, iam non ego, sed viuit in me Christus.* Utinam verò  
felix hoc verbum nunquam ex ore nostro dimissemus,  
sed ut est ingenium hominum, ecce in repentinam ex in-  
solenti triumpho recidimus miseriam. Ut enim quod  
erat officij nostri, de die in diem renouare interiorem ho-  
minem negleximus, à Sathanā circumuenti, & ab eius in-  
strumento carne nostra fascinati, redijmus in veterem,  
cæcum, pauperem, nudum, miserabilem. Hoc verò gra-  
uius malum quod cæcitatem inter iucunda, miseriam in-  
ter diuitias numeremus. Sed fallimur turpissime! nam  
non degeneres in acumine iudicij, à progenitoribus no-

stris, hæredes quoq; calamitatum ab ipsis relictorum ef-  
ficimur. Iudicant illi ex vno curiosiori aspectu deletabi-  
le lignum, inq; illud maiori feruntur impetu, ideo opta-  
ta excidunt scientia, malorum autem cumulis, vnde spe-  
rabant voluptatem operiuntur. Sic & nos, quoties nos  
vertimus cum nostra curiositate, ad fruendum ijs quæ  
sensui pulchra atq; iucunda videntur, tum maximè stu-  
pemus, vulneramur, deficimus, obscuramur. Ajunt Me-  
dici periculosisssimam esse oculorum ægritudinem, si po-  
tentia visiua in se retenta, neq; foras exeat, neque cum  
lumine externas imagines recipiat, propter indurationē,  
aut oppilationem humorum, vel tunicarum: desperatur  
& spiritualis oculi facultas, si nihil prorsus lucis à cælo  
prouenientis recipit, neq; se mouet ad speculandum, vel  
recipiendum proprias imagines, lucro, ventositate, volu-  
ptate incrassata. Tales olim tenebras circumferebant illi  
cætus idololatrarum, quos iussu Dei Ezechiel per for-  
mina spectabat, in templo Salomonis, Solem, Venerem,  
bestias adorantes, quasi id non videret Dominus. Vidit,  
& profundissimam foueam, cæcitati eorum præparauit.  
Scio cuiq; suum idolum esse quod impensis amat, scio  
difficile reperiri hominem, qui totus sit ex Deo, cum  
Deo, in Deum, sine affectu ad creaturam: nos tamen au-  
deo cogitare aliquem in Christianis ita miserabilem re-  
periri, cui nec vnis cum Polyphemō sit in fronte oculus.  
Inflammatio, turbatio, suffusio, tuberculi, maculæ, de-  
bilitates, quem nostrum non exagitant? qui cum igne  
deuorante æstuantis concupiscentiæ habitamus, quorū  
sunt

sunt intus pugnæ, foris timores. Factum quid bene,  
subito noxius humor vanissimæ laudis affluit: erratum  
est, suffundimur. Multi strabonum instar, cælum & ter-  
ram spectamus, plures maioribus ludimur imaginibus,  
quam res ipsæ sunt, quod non terris utamur specillis ad  
videndum, vel maculatam circumferamus pupillam.  
Non promittimus lumen corpori, si oculus exulcerat o-  
culum, si pupilla est in periculo, si facultas cernendi pro-  
strata, si medium, si proportio, inter obiectum & potenti-  
am sublata est. Et spiritualis oculus, suos habet humores,  
suasq; tunicellas, quibus in videndo perficitur, cor pu-  
rum, conscientiam bonam, charitatem non fictam. Lu-  
cidissimi sunt isti humores, qui mansuetudine, integri-  
tate, misericordia continguntur, splendet instar pupillæ,  
in rectam porrecta intentio lineam, quæ nullis imaginum  
simulachris decipitur, aut inflectitur à vero bono, medi-  
um est gratia, proportio meritum, obiectum salus. Ocu-  
lus iste corporis, insignem sapientiam sui artificis ostendat,  
quod in loco excelsiore, quasi in quadam specula, ad  
dirigendas cæterarum partium functiones resideat: ma-  
gni æstimarur, & quia maximè necessarius, & quod semel  
amisi nulla est recuperatio. Excusserat quondam furor  
Adriani cuidam seruulo oculum, utq; deferbuit tyran-  
nus, factum dolet, vult furorem suum vlicisci, querit  
optionem talionis. Respondet exoculatus, oculum vo-  
lo à capite auulsum: quasi diceret, tanti damnum æsti-  
mò, ut nihil in vicem reponas, nisi oculum reponas. Ocu-  
lus renouatæ mentis nostræ, opus est multo magnificen-  
tius

tius! index enim est multo illustrioris sapientiae, quâ Deus perdidit sapientiam sapientum huius saeculi. Oculus iste noster, fide Christi alijſq; gratijs illustratus, non solo verbo constitit ut hic corporis, sed multis plagis, vulneribus, contumelijs, crudelissima deniq; morte filij Dei. Cogitate quantum sit beneficium, spiritualem hanc vivendi aciem consequi, quis dolor, & quanta iactura eandem amittere. Nos vero rem tam pretiosissimam, par oculorum spiritualium, Iustitiam, & veritatem, per Iesum Christum nobis donatam, nihil ducimus, quasi gratia, non gratia, sed debitum quoddam esset; mortuam fidem, sepultum & obscuratum iudicium, saepe circumferimus, in tenebris, quasi nunquam fuissimus filij lucis, ambulamus. Est fateor difficile etiam religiosa corda ( ut inquit S. Leo ) mundano puluere non sordescere, sed vulneris periculum, excitante nos & cooperante nobiscum auxilio diuino, effugere non est difficile. Impeginus forte grauius, medicinam celerrime quaeramus, antequam consuetudo saniem colligat, ne forte subito praoccupati die mortis, quaeramus spacium penitentiae, & inuenire non possimus. Discamus ab ijs, qui serpentibus, viperis, cæterisq; bestiis conuiunt, primo statim tempore presentissimis antidotis repellere venena peccati. Si volumus in ignea tela nequissimi armari, si oculum inter tot pestes, & monstra obiectorum, à labe, à contagione, à vulnere, integrum seruare. Velle certe debemus, si ex uno intuitu oculorum, mors, & vita oriuntur. Aperiam ego secretum medicorum præstantissimi. Fernelium credo cogitatis

cogitatis, aut Saxoniam, aut Aquapendentem, vel ex veteribus Galenum, Hypocratem, Auicenam, & similes? neminem horum cogito, qui professi curationum scientiam, se ipsos curare non possunt. Illum dico, qui protestatur se habere potestatem ponendi animam, & rursus sumendi eam: qui ex omnium nostrum morte gloriosissime triumphauit, qui crucifixus ex infirmitate, viuit ex virtute Dei: qui vocat ea, quæ non sunt, tanquam ea quæ sunt, quiq; solus docere potest homines scientiam. Is ille medicus est, qui in persona Samaritani descendens, per hanc viam vitæ nostræ, spoliatum, cæsum, à latronibus niiserum hominem, oleo & vino misericordiæ, atq; iustitiæ suæ recreatum collegit, & in hospitio militantis Ecclesiæ, securissimè collocauit. Is inquam sapientissimus, clementissimus Dominus noster, Iesus Christus, per Ioannem, in Apocalypsi Episcopo cuidam depositæ, & desperatæ ægritudinis suadet, vt si se diuitem, perspicacem, si ornatum esse cupiat, collyrio iniungat oculos suos. Horret quis acrimoniam & mordacitatem collyrij: non meminit is vulnus vulnere sanari, parumq; valere ad sanitatem in quo nihil fuerit amaritudinis. Non nego fore aliquid cum nostro collyrio molestiæ, sed premium, virtus, & usus superior est, omni molestiarum difficultate. Non enim ex usitatis pharmacorum pulueribus, non ex transmarinis herbis, sed ex metallis preciosissimis, ex supra mundanis hortis colligitur. Aurum purissimum, crystallus splendidissima, spiritus viuacissimus, non chymica arte, aut experientia in vitrum raptus: se de sursum

B

à Patre

à Patre lumen, donatus fragilitati nostræ. Oculus ter-  
ræ sal politissimum, in hanc quoq; veniunt vocationem, &  
hæc omnia & singula ex alieno orbe. Satis pretij habet  
ex se aurum, & quæ commemorauimus: multo tamen  
pluris censentur ea, quorum sunt symbola & notæ. Quid  
enim conferas cum diuinis virtutibus, quæ omnem valo-  
rem auri, & topazij superant? Vnius charitatis pondus  
quantum est, cui celebrandæ nec hominum, nec Angelo-  
rum linguae sufficiunt, quæq; non orbis terratum amplis-  
simis spacijs, non deniq; felicissimis beatorum sedibus  
coarctatur. Qualis enim & quantus Deus, tanta & cha-  
ritas est, quia Deus charitas est. Aurum est charitas, in-  
ter alia virtutum metalla, & aurum ignitum, quia & con-  
tinuo ascensu suo in supera, nobilitatem: & superflorū  
consumptione, præstantem virtutem suam probat. Non  
potest pauper aut miserabilis esse, qui hoc auro abundat.  
Quapropter ad collyrium hoc faciendum, in primis sua-  
detur ægerrimo Episcopo, vt emat sibi aurum ignitum,  
Crystallum dico, timorem Domini, quem sicut buccellas  
crystalli, accipimus è cælo demissum, vt æstu concipi-  
scentiarum represso, puritate niteamus. Faciem frigo-  
ris huius crystalli, quæ ignis inordinati flama sustinebit?  
est verò ob puritatem intentionis, qua homo in Deum cō-  
uertitur, valde accommodatus timor Domini, ad recipi-  
endum lumen gratiæ. Qui timent Dominum, ( inquit sa-  
piens:) præparabunt corda sua, & in conspectu eius san-  
ctificabunt animas suas. Non est sine vitali spiritu hoc  
collyrium. Quis iste erit? quem nobis ipse fons vitæ lu-  
culen.


culentissimè commendauit, cùm altiore voce clamitaret,  
in maximis concionibus populorum? Discite à me quia  
mitis sum & humilis corde. Multum habet de spiritu, &  
de spiritu viuacissimo, sancta humilitas: nam & in om-  
nem partem mouetur facillime, & cuiusvis gratiæ su-  
scipiendæ aptissima est: vtq, se probet esse spiritum, qui  
à mortalibus non conspicitur, in maximam virtutum  
lucem excrescens, non vult à quoquam videri. Si-  
mul enim vt irrepst aliqua in sublimem locum vanitas,  
perit omnis dignitas, quam non fucatam sola habet hu-  
militas. Accedit denique nostræ vñctioni, sal coro-  
nantis omnia perseverantiae. Cum terræ gruitate  
plurimam habet cognitionem firma in proposito per-  
mansio, vtque sal siccitate sua condimentum affert ci-  
borum, sic perseverantia decus est humianarum actio-  
num: arcet sal putredinem carnium, non patitur san-  
cta perseverantia, carnalium desideriorum corruptio-  
nen. Habemus excellentissimas nostrorum simplici-  
um qualitates, inspiciamus oculorum ægritudinem, e-  
iusque causas propiores: conferamus singularem vim  
& efficaciam alterabilium: credite mihi si ars, vsus, di-  
ligentia, & moderatio horum omnium accesserit, nul-  
lum fore tantum spiritualis oculi periculum, quod non  
possit à nobis præcipi aut profigari. Quod frigus  
ineptitudinis, charitatis feruori resistet? quæ inflamma-  
tio, aut lippitudo, cum timore iudiciorum Dei cohæ-  
rebit? quæ humiditas terrenarum affectionum, absorbe-  
bit vitalem spiritum profundissimæ humilitatis? quæ

denique temptationum procellæ, concutere poterunt sa-  
lem perseuerantiæ, in reconditissimis Dei consilijs, atq;  
misericordijs firmatum? Atq; cum cæteræ medicant-  
um vires satis habeant morbum repellere, hæc nostra  
singula aliquid insuper progernerant & salutare, & singu-  
lare: qua ex vetustate in nouitatem, cum quodam in-  
cremento transeamus. Nam ex auri calore nascitur ge-  
nerosissimi cordis dilatatio, spiritualis humor, iudicij de  
rebus omnibus affert claritatem: Spiritualis enim ( in-  
quit Apostolus ) omnia iudicat. Crystallinum frigus  
ex profligato tumore inanis gloriæ, gignit albedinem ca-  
stitatis, veluti lilyum pulcherrimum. Salis siccitas, pu-  
rificat suffusiones, proportionem oculorum, ad rem vi-  
dendam restituit, & salutarem in penetrandis cælestibus  
tribuit agilitatem. Praæclara inquieres medicina, sed in  
temperie diuersarum qualitatum facilis & is periculosis-  
simus error. Est quod metuas, nam & spiritualibus me-  
dicis regula, & princeps parandarum virtutum est discre-  
tio. Sunt etiam hic libræ, est & ponderum symmetria,  
ab illo exemplari petita: quod Christus pro peccatis no-  
stris, ex rigore iustitiæ, Patri satisfaciens, sustulit in ligno.  
Supra iacentem lineam, surgens de medio in altum radi-  
us, facit æquilibrium: iacentis linea extrema, libras de-  
mittunt, radius supra eminens, indicat ponderis iustiti-  
am. Honor & amor Dei, faciunt nostrum æquilibri-  
um, in cruce Christi. Iacens linea est amoris latitudo,  
quam nobis filius Dei, in ligno exhibuit: surgens è me-  
dio in altum radius, honor est crucis, quæ Deum ho-  
mini

mini vnitum sustinuit. Veritas, & iudicium, ex  
hoc æquilibrio pendent, receptoria ingredientium no-  
stri collyrij: in veritatis libram, charitatis aurum depo-  
ne, vt ex cordis puritate, feraris in amorem tuum De-  
um; verbum pondus tuum, quia quantum eum diligis,  
tantus es. At iudicij libram, timorem & perseueran-  
tiam colloca, sed perseuerantiæ sal, duplo crystallum  
& spiritum supereret: est enim pondus iustissimum, ex quo  
cernitur & ipsius charitatis adæquaatio. Iam sic tem-  
perie ordinatâ, diuina hæc simplicia, effunde in mensam  
patientiæ, quam Deus parauit amicis, in conspectu suo,  
aduersus eorum tribulatores: tunde omnia simul pistil-  
lo durissimæ mortificationis, idque tantò tempore, do-  
nec singula benè contrita, & emollita coeant in mas-  
sam iustitiæ. Dictum est enim. Nisi facta carnis mor-  
tificaueritis, moriemini. Sed nondum liniendo apta  
erit medicina, nisi fuderis oleum de super; non pecca-  
toris, quo non impinguatur caput Domini, sed lætitiae  
& exultationis, quod conuertit planctum, in gaudium.  
Ferendum est animo æquissimo, imo serenissimo quic-  
quid euenerit: quia sic Dominus, quoscumque recipit in  
filios, affligere solet. Vis præterea in oculos cæle-  
stem inducere colorem, ad ornamentum, sic formatum  
corpus iustitiæ, consperge lactis dulci candore, inno-  
centi doctrinæ diuinæ puritate, & doctrâ ex alto vitæ  
innocentiâ. Hæc enim permista, admirabilem gratiam  
pariunt, in oculo spirituali, fitq; vt ex oculi candore to-  
tum illuminetur corpus. Habes collyrium: iunge

( vt inquit Christus ) oculos: habes modum redeundi  
ad gratiam, ex ipsius Domini præscripto, vtere, age pœ-  
nitentiam, vt ipse explicat per Prophetam suum, æmu-  
lare charismata meliora, currens iam post odorem vn-  
guentorum dilecti tui. Crede mihi, vncio ista præter  
sanitatis beneficium, maximè intellectum nostrum il-  
luminabit: vt gloriam Christi speculantes, à claritate  
in claritatem progrediamur, tanquam transformati à  
Domini Spiritu. Non erit, cur ex sollicitiori mandato-  
rum Dei obseruatione, timeamus aliquam in scientijs  
iacturam: scientia enim quæ propter virtutem ( vt in-  
quit Bonauen.: ) contemnitur, per virtutem acquiri-  
tur. Vngit te alius, tu vngeris, projicit ille oculos in  
te cognitionis, tu oculum subijce credulitatis. Non  
time nuditatem, non miseriam, non cæcitatem, non si-  
milia probra, non amplius dicetur tibi, Nescis quia  
tu miser es, & miserabilis, & cæcus: at in omni verbo,  
in omnscientia, in omni gratia, diues factus gloriahe-  
ris in eo, ex cuius vulneribus, totum hoc nostrum pro-  
fluxit collyrium, qui factus est nobis sapientia à Deo,  
& sanctificatio, & redemptio, & lumen in tenebris ad  
dirigendos pedes nostros, in lucidissima via mandato-  
rum suorum. Quoniam igitur aduenerunt nobis dies  
pœnitentiæ, ad redimenda pecata, ad saluandas ani-  
mas, ad auertendam cæcitatem miserabilem, ad conse-  
quendam lucem, ex gratia Dei orientem, humiliemur  
in conspectu Dei, dicentes cum Propheta. Ecce sicut  
oculi seruorum, in manibus dominorum suorum, sicut oculi  
ancillæ

ancillæ, in manibus dominæ suæ, ita oculi nostri ad te, dol  
nec miserearis nostri. Fatemur nos esse catellos, cum  
Chananeide indignos mensa tua, quia nomen sanctum  
tuum irritauimus, sceleribus nostris: sed tu Domine  
qui voluisti propter nos esse filius Dauid, recordare bo-  
nitatis tuæ, & miserere, quia multum repleti sumus de-  
spectione. Mitte de alto preciosum hoc collyrium  
sacræ pænitentiæ, applica ipse digitis misericordissimæ  
pietatis oculis nostris, ut scissâ caligine, & nubeculis,  
effundamus persalutares lachrymas, omnem humorem  
noxium, & lumen gratiarum tuarum capiamus. Con-  
tere laqueum venatoris Diaboli, deijee potenti dexte-  
ra tua, graue iugum peccati: fac vt à timore tuo, no-  
num concipiamus spiritum humilitatis, dilectionis, con-  
stantis propositi, in quærenda & perficienda sanctifi-  
catione nostra, iuxta beneplacitum tuum. Audi vo-  
cem & gemitum columbæ tuæ, sponsæ tuæ, Ecclesiæ  
tuæ, pro nobis deprecantis, & mentes nostras illustra  
lumine claritatis tuæ, ut videre possimus, quæ agenda  
sunt, & quæ recta sunt agere valeamus, per eum, in quo,  
per quem, tibi placuimus Christum Dominum. Cui  
tecum, & cum Sancto Spiritu, trino & vni Deo,  
sit honor & gloria, in sæcula sæculorum. Amen.



*D. Bernard. super Cant. Serm. 30.*

**H**ypocrates & sequaces eius, docent animas saluas facere in hoc mundo: Christus & eius discipuli perdere. Quemnam vos ē duobus Magistris eligitis? At manifestum se facit, qui sic disputat, hoc oculis, hoc capiti, illud pectori vel stomacho nocet. Profectō vnusquisque quod à suo Magistro didicit, hoc in medium profert.



